


- Yvonne Webb: **mester cana un procedura largo prome cu restauracion di edificio Ecury tuma lugar**



ORANJESTAD (AAN) -- Manera ta conoci Fundacion pa Cuido di Monumento tin e intencion di renova e Edificio Ecury unda cu Museo Nacional mester bin den dje. Pa basta tempo caba ta existi e proyecto en cuestion pero te ainda e no a worde ehecuta. Pa busca informacion tocante e motivo pa cual e proyecto aki ta parce wanta, DIARIO a acerca Arq.Yvonne Webb, encarga cu Oficina di Monumento, kende a menciona lo siguiente.

"Den e Museo Nacional dif-

erente sorto di museo mester bin den dje. E decision pa defini cual di e museonan ta bin aden no a cay te ainda. Pa bin na un solucion riba e punto ey, mi a sugeri pa trece un experto riba tereno di museo, for di Hulanda, pa e haci un estudio pa wak cual di e museonan por fit den dje. Museo Arqueologico si ta sigur cu lo bin aden pero mi no sa si Museo Historico of Museo Numismatico of un galeria di arte tambe ta bin aden".

Pa haci e restauracion ta fun-

damental pa sa kico ta bin den e edificio pa por adapta e edificio na esey.

Arq.Webb a splica cu un edificio nobo ta worde traha manera e ta worde pidi, pero den edificionan existente ta bira mas complica pa defini kico por bay aden pasobra e espacio ta limita.

Tambe el a comenta cu na november di aña pasa el a entrega na e ordenator EEG un proyecto dossier, pa asina e experto por evalua ki sorto di ideanan ta bin aden y haci un estudio pa wak si mester bin

un departamento cu ta bay cuida e lugar (museumdienst).

Despues cu e experto, ken ta bin pa mas of menos dos luna, haci su estudio, e ora ey lo tin un "programa van eisen" pa asina defini tur e exigencianan cu ta rekeri den e edificio.

"E experto aki ta bay defini tur esey pa esnan cu ta bay dicidi cu ta bin aden, pasobra esaki no ta den mi man", Arq.Webb a acentua.

Despues di e raport aki e ta bay na tres arquitecto pa duna oferta pa haci e proyecto pa EEG.

"Esaki ta un procedure hopi largo cu EEG. E tres arquitectonan ta cla ta wardando pero e estudio di e experto mester bin prome pa nan por duna un oferta, y asina di e tres arquitectonan esun cu ta duna e oferta mas abao ta haya e proyecto en total pa bay pinte y prepare full", Arq.Webb a splica.

Den linea grandi esaki ta e pasonan cu mester duna prome cu ehecuta e proyecto ariba menciona.

Arquitecto Yvonne Webb a splica tambe cu EEG su procedurenan tin biaha ta tarda hopi door cu nan tin cu bay diferente pais, entre otro, Bruselas cu ta e sede principal, y di ey ta bay tur pais cu ta afilia na dje, y ora di pidi

oferta pa e compania bin construi esey ta bay na tur pais cu ta afilia na EEG.

Cu otro palabra, tin un destaho publico cu ademas di ta localmente e ta bay rond mundo, loke ta nifica cu e compania contratista por ta uno di Aruba mes of por ta di afo tambe, ya cu esaki ta e normanan di procedure di E.E.G.

Riba e pregunta cuanto tempo tur e tramitacion aki ta bay tuma, Arq.Webb a contesta:

"Loke mi a compronde door di e personanan mes cu ta prepara e proyecto na E.E.G cu e preparacion ta bay tuma por lo menos dos aña. Si nos tin suerte y e experto y e arquitectonan traha lige, nos por gana tempo. Pero e procedure pa e destaho publico bin cla ta tuma dos aña".

Si ta asina cu Oficina di Monumento ta pone como condicion cu e compania cu lo bin eherce e trabao mester tin experiencia den e ramo, pasobra restauracion no ta un trabao comun pero ta un trabao di specialistanan.

"Pesey pa loke ta trata destaho nos tambe tin exigencianan cu nan mester muestra experiencia den e ramo di restauracion", Yvonne Webb a enfatiza.

Den otro articulo DIARIO ta sigui elabora riba e entrevista cu Arquitecto Yvonne Webb.